

桂苑筆耕集

三

桂苑筆耕集

PDF

桂花筆耕集卷之十五

齋詞一十五首

應天節齋詞三首 上元黃籙齋詞

中元齋詞

下元齋詞二首

上元齋詞

中元齋詞

黃籙齋詞

懷火齋詞

天王院齋詞

故昭義僕射齋詞二首

應天節齋詞三首

道士某乙言伏以聖人降生王者嘉應包天地之大
德啓日月之殊祥是以電繞虹流克符龍質握乾披
震允叶龜書伏惟聖神聰睿仁哲明孝皇帝紫府真

宗丹陵寶命孝理而勤修一德化成而胥悅萬方偶
以大火堯威熊驚漢御猶軫泣辜之念暫勞展義之
行今者風振南薰方在長贏之節星瞻北極乃當誕
慶之辰莫不山靈供萬歲之歡聲河伯獻千年之瑞
色仰資聖壽敢設仙齋廣成子之微言既傳衆妙華
封人之善祝實繫羣誠伏願德乃日新禍當天悔暫
興時雨遍洗妖氛高整鸞旗早迴鳳輦然後搜濟汾
之詠撰封岱之儀傳芳於玉葉金枝積慶於天長地
久使蠻戎率服蠢植咸蘇仰沐華胥之風齊登仁壽
之域普天率土永賀昇平

又

道士某乙言伏以父天母地帝道所以爲尊貫月繞
星靈符於是乎在况覩一人有慶固知萬壽無疆伏
惟皇帝陛下龍握丕圖鳳資聖紀播休聲於里社標
盛禮於高標今者風調舜琴日緩羲轡曆章舒芳於
八葉丹陵降瑞於千齡謹設仙齋仰陳善祝伏願塵
銷九野波息四溟早迴西幸之儀便舉東封之禮一
千年之休運高建武功三十世之昌期倍延福祚允
諧大寧永賀中興

又

伏以瀨鄉白鹿既掛仙蹤函谷紫雲果實王氣積慶
於天長地久傳華於聖子神孫耀玉京而我李長春
演金籙而莊椿永茂伏惟皇帝陛下三無稟德萬有
覃恩叶感星夢日之祥掩四乳八眉之瑞上天降聖
爰乘解慍之風列士修齋况值晏陰之月伏願峒山
順軌汾水迴鑾迎萬歲之岩音歸九重之天闕享七
百年之休運寰宇中興守五千字之格言兵戈大定
仰祈玄鑒永護皇居

上元黃籙齋詞

年月朔啓請如科儀伏以有德不德無名可名自施

倏忽之功莫究希微之旨是以紫府乃修心可到玄
關非用力能開臣志慕真風躬行正道但以漢良前
筋猶勞戰伐之謀越蠡扁舟未遂優閑之望既榮人
爵須報主恩誓殲無賴之徒久練不祥之咒動拘俗
後慮犯玄科今則節已及於上元灾未銷於下界謹
修常醮仰貢微誠所願梟覆頑巢鳳迴仙駕帝座與
三台永耀玉畿興九牧皆安雷驚而蟄戶全開風掃
而妖氛靜息俾臣靈根日茂至業天成肅符提闡外
之權終安澤國虹節指壺中之境得認家山臣無任
虔肅禱祠懇悃之至謹辭

中元齋詞

年月朔啓請如科儀伏以道本強名固絕琢磨之理
身為大患深驚寵辱之機能審自然而然必知無可
不可是以雕詞贊美則乖妙旨於混成矯志求真則
爽竒功於積學冀標玉籍在守金科臣才謝丰千雖
慙賢路心擬正一早扣玄關齋誠於八節三元鍊志
於龍緘鳳蘊但屬鯨翻逆浪蛟噴毒沙數年興靈螫
之灾萬姓抱瘡痍之苦三尺劍高提在手須救危時
六銖衣輕掛於身未諧夙願今謹因中元素節大慶
良辰依寶壇而醮設常儀企仙闕而拜申精懇伏願

真風蕩滌玄澤湧流吾君享萬歲於巖音賢相耀六
符於渭訣調舜絃之美化永復昌期溷湯網之兇徒
咸歸顯戮然後戴髮含齒鱗潛羽翔不知日用之功
各遂天成之樂俾臣代敷善繼真位高遷留形於烟
閣雲臺繼賞於芝田蕙圃鑄金追想終榮聖主之恩
叱石閑遊得效仙人之術儻非過望敢不精修臣某
無任祈恩謝過虔禱懇悃之至謹辭

下元齋詞

年月日啓請如科儀伏以教資妙用無爲而無不爲
道在勤行不厭是以不厭苟得捧持三寶必能極護

萬靈須憑善建之根株始覩混成之閭闕故曰大丈夫處其厚而不處其薄居其實而不居其華者也臣雖塵役拘身而雲裝挂志大成是望上達為期每依郭璞詩中精調玉石願向葛洪傳上得寄一名所以仰欽象帝之先豈在他人之後聽爛柯翁之說則倍惜光陰覽抱朴子之言則不虧忠信但以卑棲俗累深握兵符政刑之得失難調賞罰之重輕易忒暗堆慙咎莫補精修况叨真位之榮恐負玄科之責是以三元八節顯醮遙祠唯期致力於九層未嘗妨功於一簣今則天吏扣應鍾之候水官攬玄轡之時月數

就盈日辰在望仰投靈地敬設寶壇備儀於琳几瓊
盤注想於金臺銀闕冀感通於良夕能濟援於危時
伏乞太上三尊十方衆聖曲垂玄鑒俾遂丹誠早回
翠輦於長安復振皇風於正始肅陶鈞者永諧德化
伏節鉞者共戢兵戎波濤靜寢於四溟氛霧豁開於
九野樹下有推功之將草間無求活之徒至於翔翼
躍鱗跂行喙息偕登仁壽之域不躡昏迷之途使臣
深結道緣遙申齋願望三清於通路資一溉於良田
此時枕越石之戈暫妨高卧他日把浮丘之袂豈訝
後來臣某無任瀝懇投辭虔禱惶切之至謹辭

又

年月日啓請如科儀臣伏以測管窺天雖垂曠望揮
戈駐日蓋感精誠苟爲山之力不虧則至海之期何
遠仰玄門之善聞遵妙道以勤行但以爲子爲臣曰
忠曰孝既增榮於國祿願無忝於家勲手握玉符且
救寰中之難志棲金錄唯思象外之遊每慮政失務
三法虧畫一雖慎撫綏於南交尚多慝咎於北鄙况
當前寇爲期弭兵未暇今則月就盈數日臨下元遙
倣真儀敬陳齋法儼星壇而稽首想風馭以馳魂伏
乞太上三尊十方衆聖玄慈見蔭良願克諧翠華早

耀於秦雲皇祚永興於漢日百官多慶八裔同歡
寇則銷燧象之災幽滯則假燭龍之照然後使臣世
官貞吉道業滋成遺榮待泛於五湖企想潛通於三
島作人間之都尉削訓無心拜天上之侍郎沈義有
望唯願在家必達終能直道而行臣無任祈恩懺罪
虔切惶恐之至謹辭

上元齋詞

年月日啓請如科儀臣仰察玄經乃見道資衆甫俯
稽聖典則知神應至誠是以早詳病病之言每勵賢
賢之行五音五色實除耳目之娛六甲六丁潛致爪牙

之後顧躡輕飛之路常敲衆妙之門但屬戎馬生郊
陳蛇奔穴無苟免而臨難不得已而用兵蓋報主恩
慮虧臣節只誓顯誅寇孽寧知暗積愆殃雖軍律克
申而真科是懼今以日延和景月滿初元遇吸新吐
故之辰懺喙腐吞腥之罪儼陳醺禮敬薦齋誠燈耀
九光燼焚百和寂寥塵外幡幢靜設於星壇髣髴雲
中環珮似傳乎風馭異銷妖祲仰告威靈伏乞大降
玄慈下從丹懇萬乘永資於萬壽百官皆荷於百祥
戰場則荆棘叢生農壤則麥禾花茂凡云蠢動盡獲
昭蘓然後俾臣援溺功成奉身以退冲靈道遂鼓腹

而遊飽瓊藥之糗糧就瑤臺之蹊徑遇圯上者終諧
素志自有前蹤入壺中者蓋感專心寧無後望既殊
捕影敢憚勞形臣無任悔過祈恩虔切惶恐之至謹
辭

中元齋詞

啓請如科儀域中之四大難名字之日道物外之三
清在想心以為齋豈圖滋福於一身唯願洽恩於萬
彙臣生逢聖日志慕真風寧貪久視之門有覬輕飛
之路但以行先不殆德貴有餘每虔一氣以存思非
止三元而展敬今則雲摧火影風戛金聲當中元積

慶之辰謹修常醮以下界罹災之事仰告玄慈一昨
夏景既闌秋成甚邇而乃曠野則飛羊斂翅深泉則
黑蛟藏鱗嗷嗷之黔庶何依烈烈之蒼穹莫訴雖近
沾美澤而尚憊農郊伏乞太上三尊十方衆聖下從
精懇大庇生靈使風雨常調煙塵永息興聖祚於千
秋萬歲振歡聲於四海九州然後俾臣功名則與國
同休道業則在家必達水中泛泛謝時態之澆浮雲
外飄飄逐仙蹤而騫翥既探珠而有望寧種玉以無
因臣不任祈恩救災懇禱虔惕之至謹辭

齋詞

啓請如科儀伏以混成至道本在勤行衆妙玄門唯
資善閑故曰修之身則其德乃貴修之國則其德有
餘既能事小功多可謂暫勞永逸臣雖手提金鉞而
心寄瑤臺飄飄然自有良期擾擾者誰知積學是以
三元致敬一氣存思佇天上之雞聲潛懸素望待海
中之鶴信每瀝丹誠終冀用之則行豈言深不可識
今者謹賁薄禮仰贖玄慈所願轉茂靈根漸拋俗界
餌崦嵫之奇草飲沆瀣之仙漿漢代淮王終遂仙遊
之樂周時柱史何妨吏隱之名苟保天成奚言日損
景仰於其中有象願知於此外無求臣無任投辭懇

迫虔禱兢越之至謹辭

黃錄齋詞

啓請如科儀臣身拘俗網志仰真筌雖窈窕冥冥至
道則無形可扣而勤勤懇懇精心則有感必通是以
每勵焚修敢安晷刻所冀學海而終歸巨海好龍而
不懼真龍豈貪輕舉之名但效勤行之旨然以早分
相印久握兵符當扶危靜亂之秋有戮暴誅奸之後
伏慮政條失所刑律乖宜僣違暗積於玄司殃咎難
逃於黑籍今則景銷木德卽啓火威稽首昊天叩心
靈地跼蹐而謹陳薄奠禱祠而仰獻微誠伏乞太上